

«Biars manegian che nus seigien veterinaris, e finiu»

Singulas alps han scargau e quels proxims gis tuornan cuntinuadamein muaglia e muntaneras a casa. Ils veterinaris, ch'ein disai cun bia e diltut, han giu ina stagiun turbulenta. In da quels ei Fadri Vincenz da Vella. La FMR ha discurreu cun el.

AUGUSTIN BEELI/FMR

La stad d'alpeggiun 2022 ei stada specialemente en plirs regards. Gia baul eis ei staus terren e las alps ein stad semtgadas baul. Suententer la cargada ha la perioda senza precipitaziuns cuntinuau. Igl ei stau schetg sco aunc darar ils davos onns. Vitier lezza situaziun ha il luf murdergiu las muntaneras, cunzun dallas nuorsas. Malgrad seivs, claus e tgauns da schurmetg han els fatg in pulit disorder. Els han strapazzau la gnarva e las emoziuns da possessurs e persunal d'alp. Il veterinari *Fadri Vincenz* da Vella «sa cantar ina canzun da quella stad hectica». La FMR ha empruau d'eruir sia bilanza dallas stagiun d'alpeggiun.

FMR: Ei para che tuts involvai, centers da cumpetenzza, organizaziuns, uniuns ed instituziuns, bagien piars la controlla dallas consequenzas ch'ils roschs da lufs caschunan?

Fadri Vincenz: Jeu crei che la politica federala, ed era las organizaziuns che promovon quels per tut prezi, bagien piars la controlla. Segir e franc eis ei ina situaziun nova cun in tal diember das lufs, denton astg'ins buca semplamein far vinavon sco tochen dacheu cul management dils lufs. En mes egl eis ei buca capeivel daco ch'ins ha schau vegnir ei schi lunsch. Ins sto empruar d'anflar ton pli spert sligiazziuns per che nus ellas regiuns muntagnardas vegnien da viver ensemen cul luf. Ina fusa da regular il diember, aschia sco nos catschadurs fan ei gia cun autra selvaschina. La finamira centrala sto esser che quei rapinader vegn puspei spuretg e fui dil carstgaun. Quels che fan problems ston naven. Lu havein nus suenter aunc adina in diember denter 10 e 20 lufs che serepartan sigl entir cantun. Quels support'ins fors, perquei ch'els ein pli spuretg e fan fetg darar donns als animals da casa.

Biars vulessen ragischar cumplettamein ils lufs. Tgei manegies da gliez?

Da mia clientella negin che gi che nus duegien ragischar ora diltut els. Nus vulain e stuein haver ina moda e maniera da controllar ils roschs. Jeu gitgel quei buca mo sco veterinari, mobein era sco allevatur da nuorsas. Dapi biars onns hai jeu mez ina pintga muntanera. Zatgei stuein nus far. Ei dat per exempel pasturs che dierman sper il claus da notg. Els raquetan ch'els audien il cumpogn che s'avischina, mo ch'ei seigi nunpusseivel da far zatgei. Fierer in crap sil luf nezegia nuot. Lu scappa el e tuorna 50 meters da tschella vart. Il luf emprèn ch'el sto mo ir entuorn la seiv tochen che las nuorsas

vegnan en panica e rumpan ora, ni tochen ch'els tgauns pon buca pli.

Suententer questa stad ei il futur dall'alpeggiun da nuorsas sin stadera?

Ins sto saver che la tratga d'animals manedels ei ina tradiziun dallas Alps dapi melli onns. Ed ins sto era saver che vacas, cavals, cauras e nuorsas sesentan la stad da caliras il meglie sillas pastiras aultas. Per in animal saun dat ei nuot meglie. Ins sa bein tener ellas a casa, era cun 30 grads. Mo ellas sesentan meglie ed ein bia pli saunas sils aultas. Era la problematica da malsognas e parasits ei bia meglie sch'ellas han plaz e san ir. Sch'ins sto tener a casa van ellas adina sillas medemas pastiras ed il ciclus dils parasits ei serraus. Si d'alp schabegia quei buca cun animals sauns.

Entochen oz han ins getg ch'ils tgauns da schurmetg ed ils claus da notg duessen garantir la segirtad. Ston ins reveder quei «recept» da defensun?

En nossas muntognas cun tonta topografia sa quei sistem buca funcziunar. Nus vulain gie buca ch'els animals pasculeschian las alps extremamein fetg mo sin ina hectara e tschellas surfatscha insumma buca pli. Exact en quella direzziun mein nus ussa. El claus da notg entuorn tegia X resta la muntanera in'jamna. Suententer ch'ins ha praticau quei dus onns aschia vesa ei ora leu sco in prau intensiv, cun in pastg grass sco sch'ins fuss ius sin 2000 m.s.m. a trer puschina. Igl ei bien pastg per la bassa, mo buca per quell'altezia. E tut il contuorn vegn buca pli



Il veterinari *Fadri Vincenz* ha stuiu tractar questa stad biars animals da casa blessai.

FOTO MAD



«Jeu vesel ch'ins sto ponderar, discutir ed anflar ensemen sligiazziuns spertas.»

Fadri Vincenz

pasculaus. Pertgei nus mein el futur mo pli ad alp cun quei sistem, cullas nuorsas en in migliac.

Quels migliacs ein probabel era ignivs da malsognas?

Gie, quei havein nus viu en differentas alps. En ina havein nus giu massivs problems culla tschoccadad da camutschs tier las nuorsas. Ins sto far differents claus. Silla camera zuppada san ins lu observar co ils lufs van entuorn quels.

Quest meins scargan las biaras alps, ed il problem sesligia probablamein buca?

Sigl unviern vegnan era las tscharvas giu ellas vals. Naturalmeins ch'il luf suonda sia preda. In roscha drova bia Pavel per survive e la resca ch'el penetrescha els nuegls ei gronda. Jeu temel ch'el entschieivi ad attaccar era vadials. Sch'in vadi va sut ina seiv dil claus ora, eis el spert naven. Il sistem cullas vaccas-mumma ha naturalmeins levgiu al luf da far preda. Vaccas rentadas en nuegl eran pli baul en segirtad absoluta, ils purs durmevan per part schizun en nuegl ed ei savevan serrar quel diltutfatg. Quei ei oz buca pli pusseivel culs nuegls libers.

Sco veterinari essas *Vus* stai permanentamein amiez la situaziun cun animals da casa scarpai e blessai. Essas *Vus* era stai empau psicolog da carstgauns questa stad?

Gie, definitivamein. Biars sutschazegian quei e manegian che nus seigien veterinaris e finiu. En quei mument ch'ieu survegn in telefon ei quella persuna da tschella vart vilada, nauschs e plein gretta. Lu dat ei auters che bragian sin telefon. Ins enonuscha gie quella glieud e sa tgei breigias ch'ella fa. Els fan tut il pusseivel e cuncunziamein, e tuttina dat ei attaccas.

***Vus* tschintscheis da purs e possessurs, ni da persunal d'alp?**

Tochen ussa hai jeu giu da far cun glieud ch'ei psichicamein stabila, che muossa denton emoziuns. Gl'emprement mument stoi jeu adina mo tedlar e mirar da calmar ils carstgauns. Lu restar ruasseivels ed entschiever ad organisar gl'andament, tgeinins salvar e tractar e tgeinins durmentar sil plaz. Sche quei va aschia vinavon, anflein nus buca pli persunal d'alp e mo purs d'animals manedels che gin ch'els possien buca pli.

Igl ei da supponer ch'in tal cass occupi *Vus* buca mo in'ura?

Aschia eis ei, in gi varga sco nuot cun in sulet tal cass. Ti sas esser cheu e tractar ils tschuts cun blessuras, ed il luf va leu vaden ella muntanera. Nus veterinaris resentin quei sco frust, nus essan sco pumpiers che stizzein fiugs, adina essan nus dus pass anavos. Ella politica ei quei il normal. Ils lufs da problems mudregian nus perencunter senza fin. In fuog san ils pumpiers silmeins stizzar, nus essan adina mo vid reagir. En quei connex givischassen nus in mied pli spert per saver reagir. Cun gir per exempel direct: 'So, quel ha fatg ussa tons e tons problems,

quel sto naven.' Spitzgar ina entira stagiun ei memia gitg.

Ton tier la situaziun culs animals manedels. Tier la biestga eis ei puspei auter?

Per nus veterinaris ei la situaziun autra, la biestga vegn semplamein pli agressiva. Sch'ins entra en in nuegl sa ei esser ch'ei scadeina tuttenina. Per exempel ina vacca che seglia viaden agl jester. Nus essan confruntai cun cass ch'ina vacca che ha da far vadi ei aschi agressiva ch'ins sto narcotisar ella cumplein per saver trer ora il vadi. Aschia vegn ei extremamein malsegir per tuts, persunal d'alp, pur e veterinari.

Avon in'jamna haveis *Vus* stuiu durmentar in vadi grevlessau s'ill alp da Degen. El giug ei il tschess cularin vegnius. Leu pari che la vacca seigi buca stada aggressiva enviers quei utschi grond ch'ei setschentaes ed ha entschiet a piclar ora la beglia al vadi viv?

Cu jeu sun vegnius sil plaz el claus da far vadi viveva quel. El veva il begl tgalau che era magliu ora cun ina ruosna pulit gronda. Il vadi hai jeu stuiu durmentar. La vacca era tschun meters dasperas e pasculava. Daco che quella ha buca defendiu quei vadi ei in legn. Tier las nuorsas dat ei mingaton che la mumma accepta buca omidus tschuts tier ina natschientscha da schumellins. Suententer duas jannas ei quel lu ventschius. Jeu manegiel che las mummis sappien ordavon tgeinins da lur pigns che vegnan buca atras. Sch'ei savess esser stau era cheu il motiv vegnan ins mai a saver.

Actualmeins audan ins en Surselva ina currilla surreala ord il mund dallas praulas. Ins stoppi temer ch'il tschess mondi puspei cum affons pigns. Tgei manegies *Vus* da quei?

Quei ein veramein mo praulas. Il tschess cularin ei sespecialisau sin capiengnas. El ei anatomicamein buca el cass da far attaccas. El ha buca las greflas ed era buca el bec da pigliar ni affon ni animal pign e da sgular naven cun quel. E sch'ei fuss aschia, stuess il carstgaun, ch'ei gie buca tups, saver reagir immediat. Ins sittass ils tschess che fa problems e tschels buca.

Reagir spert ei grev cun carstgauns ch'ein buca perina ed ei vegn discutau vi e neu?

Jeu vesel ch'ins sto ponderar, discutir ed anflar ensemen sligiazziuns spertas. Auter va ei buca. Igl ei fors ina sligiazziun dentoren. Falliu eis ei dar la cuolpa in a l'auter.

ARCHIV CULTURAL SUMVITG

Viaden el siatavel onn

La suprazstanzza dall'uniun Archiv cultural Sumvitg ha clamau venderdis vargou commembras e commembers alla radunonza generala. L'uniun dumbra actualmeins 188 commembers.

«Communablamain vulain nus schar crescher vinavon en nies archiv empau da quell'immensa ierta culturala», ha il president *Walter Deplazes* detg alla fin da siu plaid. El ei satisfats ch'igl ei gartegiau da fundar in liug nua che famiglias san purtar relaschs en fuorma dad actas e documents ch'ein digns da vegnir conservai, «en in liug segir, per vus, per nus e per nos vegnetsuenter», ha il president circumscriet il motiv. Ils 31 da schaner 2016 han interessents dallas vischnaunca da Sumvitg fundau gl'archiv, quel ei daventau naven dall'entschatta ina instituziun reconuschiada. Quei atesta il diember actual da 188 commembers. Era la vischnaunca

sustegn generusamein gl'archiv cultural. Per l'ina ha ella mess a disposiziun gratuitamein la stanza digl'archiv ella casa da scola a Surrein. Per l'autra fa il gerau da cultura part ex uffizio dalla suprazstanzza dall'uniun. Actualmeins ei quei *Gion Battista Huonder*.

L'uniun Archiv cultural Sumvitg ha entschiet il schaner d'uonn il siatavel onn dapi la fundaziun. Amiez quel ha la radunonza generala approbau il quen ed ils rapports, plinavon ha ella reelegiu la suprazstanzza. Il president *Walter Deplazes* ei semess a disposiziun per ina ulteriura perioda da treis onns, medemamein ils consuprastants *Tarcsi Hendry* (actuar e

vicepresident), *Pieder Wieland* (cassier) sco era ils assessurs *Werner Degonda* e *Gion Lutz*. Ella stanza da 72 meters quadrats a Surrein ha l'uniun astgauer prender encounter gia bia material. Denter auter ha la biblioteca dalla Surselva Romontscha anflau plaz leu.

Culla fundaziun il schaner 2016 ha la rimnada entschiet. Gl'archiv porscha 404 meters crunas che s'empleinan cun actas en scatas e sin crunas. Era il proxim onn selegra gl'archivar da retscheiver material prezios che documentescha la veta e las activitads d'antruras. La vera valor da quella memoria collectiva semuossa per en zacans decennis. Las proximas generaziuns

vegnan en scadin cass ad esser engraziavelas che glieud premurada per cultura e historia ha fundau quei deposit dall'ierta culturala. Suententer la radunonza generala ha il president *Walter Deplazes* discurreu cul publicist *Peter Egloff*. Sco gia pliras gadas sil program dalla radunonza generala ha era il publicist, schurnalist e translatur raquintau libramein quei e tschei. En fuorma d'ina intervesta han ils auditurs intervegniu ch'el ei naschius 1950 a Turig e che sia mumma derivava dalla famiglia Schmid da Bubretsch e fuva ina nianza digl'uestg *Georgius Schmid de Grüneck*. *Peter Egloff* ha habitau 19 onns a Sumvitg. (fmr/abc)

INSERAT

FLEXO
Innovative Handlauf-Systeme

10% Rabatt gegen Abgabe Inserat

**Treppengeländer
Innen/Aussen**

081 599 50 65
www.graubuenden.flexo-handlauf.ch